



官常典第七百六十九卷

風節部名臣列傳五

金 宗端修

召見於香閣上謂端修曰汝前爲御史以幹能見用汝言多細碎不究其實嘗令問汝亦不汝罪及端修好學喜名節中大定二十二年進士第明昌間補尙書省令史承安元年監察御史孫椿年武簡職事不修舉詔以端修及范鐸代之是年元妃李氏兄弟干預朝政端修上書乞遠小人上遣李喜兒傳詔問端修小人爲誰其以姓名對端修對曰小人者李仁惠兄弟仁惠喜兒賜名也喜兒不敢隱具奏之上雖責喜兒兄弟而不能去也四年復上書言事宰相惡之坐以不經臺官直進奏帖准上書不以實削一官朞年後敘章宗知端修不爲衆所容釋之改大理司直泰和四年遷大理丞召見於香閣上謂端修曰汝前爲御史以幹能見用汝言多細碎不究其實嘗令問汝亦不汝罪及爲大理司直乃能稱職用是擢汝爲丞盡乃心力惟法是守勿問上位宰執所見何如汝其志之知大興府紇石烈執中陳言下大理寺議端修謂執中言事涉私治罪詔以端修別出情見不當與司

直溫敦按帶各削一官解職久之爲節度副使卒官端修終以直道不振於時自守愈篤妻死不復更娶獨居二十年士論高之汝州司候游彥哲將之官問爲政端修曰爲政不難治氣養心而已彥哲不達端修曰心正則不私氣平則不暴爲政之術盡於此矣

王賁

弟質

按金史本傳賁字文孺其先自臨潢移貫宛平曾祖土方正直敢言遼道宗信樞密使耶律乙辛之讒殺其太子世無敢白其冤者土方擊義鐘以訴遼主感悟卒誅乙辛厚賞土方授承奉官父中安擢進士第坐田穀黨事廢世宗卽位黨禁解終沂州防禦使賁性孝友勤敏好學第進士由復州軍事判官補尙書省令史擢右三部檢法司正侍御史賁鉉舉賁安靜有守不尙奔競政府亦言其廉素善論議擢河北東西大名府路提刑判官選授尙書省都事以喪去用薦者多起復刑部員外郎侍御史累遷南京路按察使卒賁敦厚尙義篤於親朋不營產業比沒家甚窶上聞憫惜之贈朝列大夫仍厚卹其家弟質字敬叔登大定二十五年進士第累官吏部主事以才幹舉遷昭義軍節度副使章宗問質臨事若何張萬公對曰勝其兄賁章宗曰及其兄亦可矣後以禮部尙書致仕終

聶天驥

按金史本傳天驥字元吉五臺人至寧元年進士調汝陰簿歷睢州司候封丘令興定初辟爲尙書省令史時胥吏擅威士人往往附之獨天驥不少假借彼亦不能害也尋授吏部主事權監察御史夏使賀正旦互市於會同館外戚有身貿易於其間者天驥上章曰大官近利失朝廷體且取輕外方遂忤太后旨出爲同知汝州防禦使事未赴陝西行尙書省驛召特旨遙領金安軍節度副使兼行尙書省都事未幾入爲右司員外郎轉京兆治中尋爲衛州行尙書六部事慶陽圍急朝廷遣宿州衛總帥牙古塔救之以天驥充經歷官圍解從別帥守邠帥欲棄州而東天驥力勸止之不從帥坐是被繫逮天驥降京兆治中尋有訟其冤者卽召爲開封簽事旬月復右司員外郎丁母憂未卒哭奪哀復職哀宗遷歸德天驥留汴中崔立變天驥被創甚臥一十餘日其女舜英謁醫救療天驥嘆曰吾幸得死兒女曹乃爲謁醫尙欲我活耶竟鬱鬱以死舜英葬其父明日亦自縊有傳天驥沉靜寡言不妄交起於田畝能以雅道自將踐歷臺省若素宦然諸人多自以爲不及也

完顏絳山

按金史忠義傳絳山哀宗之奉御也系出始祖天興二年十月蔡城被圍城中饑民萬餘訴於有司
求出有司難之民大呼於道上聞之遣近侍官分監四門門日出千人必老稚羸疾者聽其出絳山
時在北門憫人之饑出過其數命杖之四十然出者多泄城中虛實尋止之三年正月己酉蔡城破
哀宗傳位承麟卽自縊於幽蘭軒權點檢內族斜烈矯制召承御石盞氏近侍局大使焦春和內侍
局殿頭宋珪赴上前曉以名分大義及侍從官巴良弼阿勒根文卿皆從死斜烈將死遺言絳山使
焚幽蘭軒火方熾子城破大兵突入近侍左右皆走避獨絳山留不去爲兵所執問曰汝爲誰絳山
曰吾奉御絳山也兵曰衆皆散走而獨後何也曰吾君終於是吾候火滅灰寒收瘞其骨耳兵笑曰
若狂者耶汝命且不能保能瘞而君耶絳山曰人各事其君吾君有天下十餘年功業弗終身死社
稷忍使暴露遺骸與士卒等耶吾逆知君輩必不遺吾吾是以留果瘞吾君之後雖寸斬吾不恨矣
兵以告其帥奔盞曰此奇男子也許之絳山乃掇其餘燼裹以敝衾瘞於汝水之旁再拜號哭將赴
汝水死軍士救之得免後不知所終

元 呂思誠

按元史本傳思誠字仲實平定州人六世祖宗禮金進士遼州司戶宗禮生仲堪亦舉進士仲堪生時敏時敏生釗爲千夫長死國事釗生德成德成生允卒平定知州致仕思誠父也母馮氏夢一丈夫烏巾白襪衫紅鞵束帶趨而揖曰我文昌星也及悟思誠生目有神光見者異之及長從蕭剡學治經已而入國子學爲陪堂生試國子伴讀中其選擢泰定元年進士第授同知遼州事未赴丁內艱改景州脩縣尹差民戶爲三等均其徭役刻孔子象令社學祀事每歲春行田樹畜勤敏者賞以農器人爭趨事地無遺力民石安兒等流離積年至是聞風復業印識文簿界社長藏之季月報縣不孝弟不事生業者悉書之罰其輸作胥吏至社者何人用飲食若干多者責償其直豪猾者竄名職田戶思誠盡祛其敝天曆兵興豫貸鈔於富民令下造軍器事皆先集民用不擾於後得官價亟以還民翟彝自其大父因河南亂被掠爲人奴歲納丁粟以免作思誠知彝力學召其主與之約終彝身粟三十石仍代之輸彝得爲良民他日買羊劉智社民李持酒來見懇其弟匿羊思誠叱之退王青兄弟四人友愛彌篤思誠至其家取酒勸酬懽同骨肉李之兄弟相謂曰我等終不敢見尹矣各具酒食相切責悔前過析居三十年復還同爨鎮民張復叔母孀居且瞽丐食以活恐思誠聞之

卽日迎養思誠憐其貧令爲媒互人以養之天旱道士持青蛇曰盧師谷小青謂龍也禱之卽雨思誠以其感人殺蛇逐道士雨亦隨至遂有年縣多淫祠動以百餘計刑牲以祭者無虛日思誠悉命毀之唯存江都相董仲舒祠擢翰林國史院檢討官俄陞編修文宗在奎章閣有旨取國史閣之左右昇匱以往院長貳無敢言思誠在末僚獨跪閣下爭曰國史紀當代人君善惡自古天子無觀闕之者事遂寢尋擢國子監丞陞司業拜監察御史與幹玉倫徒等劾中書平章政事徹里帖木兒變亂朝政章上留中不下思誠納印綬殿前遂出僉廣西廉訪司事巡行郡縣土官有于元帥者恃勢魚肉人恐事覺陰遣其子迓思誠於道思誠縛之悉發其陰私痛懲其罪一道震肅移浙西達識帖睦爾時爲南臺御史大夫與江浙省臣有隙嗾思誠劾之思誠曰吾爲天子耳目不爲臺臣鷹犬也不聽已而聞行省平章左吉貪墨浙民多怨之思誠奏疏其罪流之海南復召爲國子司業遷中書左司員外郎盜殺河南省臣以僞檄呼廉訪使段輔入行省事及事敗註誤者三十餘人將寘於法思誠言於朝皆釋之陞左司郎中思誠素剛直人多嫉之遂以言罷起爲右司郎中拜刑部尙書科舉復行與僉書樞密院事韓鏞爲御試讀卷官改禮部尙書御史臺奏爲治書侍御史總裁遼金宋

三史升侍御史樞密院奏爲副使御史臺留爲侍御史會平章政事鞏卜班不法監察御史劾之御史大夫也先帖木兒曰姑徐之思誠趣入奏鞏卜班罷大夫銜思誠將謀擠之思誠卽謁告朝廷知思誠無他遷河東廉訪使未幾召爲集賢侍講學士兼國子祭酒出爲湖廣行省參知政事諸生抗疏留之不可道中授湖北廉訪使入拜中書參知政事陞左丞轉御史中丞劾奏清道官不盡職罷之再任左丞知經筵事提調國子監兼翰林學士承旨知制誥兼修國史加榮祿大夫總裁后妃功臣傳會粹六條政類帝賜玉帶眷顧彌篤又爲樞密副使仍知經筵事復爲中書左丞御史大夫納麟誣參政孔思立受賕事或欲連中思誠納麟曰呂左丞素有廉聲難以及之遂止拜集賢學士仍兼國子祭酒吏部尙書僕哲篤左司都事武祺等建言更鈔法以楮幣一貫文省權銅錢一千文爲母銅錢爲子命廷臣集議思誠曰中統至元自有母子上料爲母下料爲子譬之蒙古人以漢人子爲後皆人類也尙終爲漢人之子豈有故紙爲父而立銅爲子者乎一座咸笑思誠又曰錢鈔用法見爲一致以虛換實也今歷代錢至正錢中統鈔至元鈔交鈔分爲五項慮下民知之藏其實而棄其虛恐不利於國家也僕哲篤曰至元鈔多僞故更之爾思誠曰至元鈔非僞人爲僞爾交鈔若出

亦爲僞者矣且至元鈔猶故戚也家之童奴且識之交鈔猶新戚也雖不敢不親人未識也其僞反滋多爾況祖宗之成憲其可輕改哉僕哲篤曰祖宗法弊亦可改矣思誠曰汝輩更法又欲上誣世皇是汝與世皇爭高下也且自世皇以來諸帝皆諡曰孝改其成憲可謂孝乎僕哲篤曰錢鈔兼行何如思誠曰錢鈔兼行輕重不倫何者爲母何者爲子汝不通古今道聽而塗說何足行哉僕哲篤忿曰我等策旣不可行公有何策思誠曰我有三字策曰行不得行不得丞相脫脫見思誠言直頗狐疑未決御史大夫也先帖木兒獨曰呂祭酒之言亦有是者但不當在廟堂上大聲厲色爾已而監察御史承望風旨劾思誠狂妄奪其誥命并所賜玉帶復左遷湖廣行省左丞遣太醫院宣使秦初卽其家迫遣之初窘辱之不遺餘力思誠不爲動貽書參議龔伯遂曰去年許可用爲河南左丞今年呂思誠爲湖廣左丞世事至此足下得無動心乎抵武昌城下語諸將曰賊據城與諸君相持經久必不知吾爲此來出其不意可以入城遂行諸將不獲已隨其後竟不煩轉鬪而入詢其故賊倉卒無備盡驚走思誠大會軍民官吏告之曰賊去示吾弱也規將復來於是申號令戒職事修器械葺城郭明部伍先謀自守徐議出征苗軍暴橫侵辱省憲思誠正色叱之曰若等能殺呂左丞乎

自是無敢復至曾未數日召還復爲中書左丞思誠去二日誠復陷移光祿大夫大司農俄得疾以至正十七年三月十七日卒年六十有五思誠氣宇凝定素以勁拔聞不爲勢利所屈三爲祭酒一法許衡之舊諸生從化後多爲名士嘗病古註疏太繁魏了翁刪之太簡將約其中以成書不果有文集若干卷兩漢通紀若干卷諡忠肅

吳當

按元史本傳當字伯尙澄之孫也當幼承祖訓以穎悟薦實稱長精通經史百家言侍其祖至京補國子生久之澄旣捐館四方學子從澄遊者悉就當卒業焉至正五年以父文應授萬億四庫照磨未上用薦者改國子助教勤講解嚴肄習諸生皆樂從之會詔修遼金宋三史當預編纂書成除翰林修撰七年遷國子博士明年陞監丞十年陞司業明年遷翰林待制又明年改禮部員外郎十三年擢監察御史尋復爲國子司業明年遷禮部郎中又明年除翰林直學士時江南兵起且五年大臣有薦當世居江西習知江西民俗且其才可任政事者詔特授江西肅政廉訪使偕江西行省參政火你赤兵部尙書黃昭招捕江西諸郡便宜行事當以朝廷兵力不給旣受命至江南卽召募民

兵由浙入閩至江西境建昌界招安新城孫塔擒殄李三道路既通乃進攻南豐渠兇鄭天瑞遁鄭原自刎死十六年調檢校章迪率本部兵與黃昭夾攻撫州勦殺首寇胡志學進兵復崇仁宜黃於是建撫兩郡悉定是時參知政事朶歹總兵撫建積年無功因忌當屢捷功在己上又以爲南人不宜總兵則構爲飛語謂當與黃昭皆與寇通有旨解二人兵柄除當撫州路總管昭臨江路總管並供億平章火你赤軍火你赤殺當從事官范淳及章迪將士皆憤怒不平當諭之曰上命不可違也而火你赤又上章言二人者難任牧民尋有旨當與昭皆罷總管除名十八年火你赤自瑞州還龍興當昭皆隨軍不敢去先是當與昭平賊功狀自廣東由海道未達京師而朶歹火你赤等公牘乃先至故朝廷責當昭皆左遷及得當昭功狀乃始知其誣詔拜當中奉大夫江西行省參知政事昭湖廣行省參知政事命未下而陳友諒已陷江西諸郡火你赤棄城遁當乃戴黃冠著道士服杜門不出日以著書爲事友諒遣人辟之當臥牀不食以死自誓乃舁牀載之舟送江州拘留一年終不爲屈遂隱居廬陵吉水之谷坪逾年以疾卒年六十五所著書有周禮纂言及學言藁

按明外史擴廓帖木兒傳子英永寧人元至正中進士察罕開府河南辟子英參軍事累薦至行省參政元亡從擴廓走定西明兵克定西擴廓軍敗子英單騎走關中亡入南山太祖聞其名使人繪形求得之傳詣京師至江濱亡去變姓名賁春關中久之復爲有司所迹械過洛陽見湯和長揖不拜抑之跪不肯和怒熱火焚其鬚不動其妻適在洛請與相見子英避不肯見至京太祖命脫械以禮禮之授以官子英不受退而上書曰陛下乘時應運提三尺劍削平羣雄薄海內外莫不賓貢臣鼎魚漏網假息南山曩者見獲傳送京師垂及渡江復得脫亡七年之久重煩有司追跡旣忤陛下又忤大臣揆之常情萬死莫贖而陛下以萬乘之尊全匹夫之節不降天誅反療其疾易冠裳賜酒饌授以官爵陛下之量包乎天地矣臣感恩無極非不欲自竭犬馬上報深仁但名義所存不敢輒渝初志自惟身本韋布遭值亂離操戈行伍智識淺陋過蒙主將知薦仕至七命躍馬食肉十有五年愧無尺寸功以報國士之遇及國家破亡又復失節何面目見天下士所以寧死不敢有他志蓋聞臣之事君猶女之適人一與之醮終身不改一食其祿終身無貳是故不正之女中士羞以爲家不貞之士中君羞以爲臣管子曰禮義廉恥國之四維四維不張國乃滅亡方今金城湯池兵極其

精將極其猛府庫充實米粟紅腐國家之盛古未有也陛下猶以爲未足於是興學校明人倫褒死節獎忠義蓋以治天下之本莫大乎禮義廉恥也以今天下之廣人物之衆不以臣一人而加少不以臣一人而加多授臣以官何益於國舍臣不用何損於事陛下創業垂統正當挈持大經大法昭示子孫臣民不宜以無禮義廉恥之俘囚而廁諸維新之朝賢士大夫之列也臣自被獲以來日夜思維咎往昔之不死至於今日惟一死可以塞責乃陛下待臣以禮加臣以恩臣固不敢賣死立名亦不敢偷生苟祿若察臣之愚全臣之志禁錮海南畢其餘命則雖死之日猶生之年陛下威加海內不患不伸於匹夫之賤然臣聞仁者不中道而改節義者不毀志以徇時故王蠋閉戶以自縊李芾闔門以自屠彼非惡榮利而樂死亡顧義之所在雖湯鑊有不得避也眇焉之軀上愧古人死有餘恨惟陛下裁察帝覽其書益重之館之儀曹忽一夜大哭不止人問其故曰無他思舊君耳帝知不可奪洪武九年十二月命有司送出塞令從故主於和林

明一 劉謙 趙善璞

按明外史陳友定傳謙江西人爲仁壽教官明玉珍入蜀棄官隱瀘州玉珍欲官之不就鳳山趙善

璞者隱深山玉珍聘爲翰林學士亦不就

羅倫

按先進遺風羅文毅公倫性慷慨樂善不疑人欺自少勵志聖賢之學嘗曰舉業非能壞人人自壞之耳郡守嘉其學行而憐其貧命邑令周之謝弗受成化丙戌廷對幾萬言指切時弊拳拳以格君務學爲說中稱引程正叔親賢士大夫之時多親宦官宮妾之時少語執政欲節其下句不從賜及第授官修撰後會大學士李賢遭喪去朝廷留之公詣其第告以不可踰數日歷陳起復非是援宋富弼及劉珙故事疏奏忤旨落職提舉泉州市舶明年商文毅相召復原官尋改南京聞白沙陳先生緒論慕之以疾辭歸時與來往居金牛山山有洞名曰太元結茅以居取給於隴畝往來共樵牧受徒講學以註經爲業若無意於世者嘗欲倣古置義田贍族或助之堂食錢弗受一日訪友值嚴寒衣單縷凍不可忍入其書室擁衾而坐友人知解衣衣之行遇乞人僵於途輒解以覆之去客晨至留飯妻語其子曰瓶粟罄矣之鄰舍予之比舉火日已近午亦曠然不以爲意大率義之所在毅然必爲人之毀譽欣戚事之成敗利鈍己之死生禍福皆所不顧云

陳祚

按明外史本傳祚字永錫吳人永樂九年進士釋褐卽擢河南布政司參議十五年與布政使周文襄王文振合疏言建都北京非便忤旨並謫均州太和山佃戶躬耕力作處之晏然仁宗立詔選用諸遷謫者祚在選中會帝崩不果用宣宗命憲臣卽均州羣試之祚策第一試吏部復第一遂擢御史巡按福建方面大吏多被彈擊禁止和買閩人德之還以白塔河湮塞請開濬轉漕果便尋出按江西時帝好宴樂頗留意狗馬聲色祚馳疏勸勤聖學其略曰帝王之學先明理明理在讀書陛下雖有聖德而經筵未甚興舉講學未有程度聖賢精微古今治亂豈能周知洞晰真德秀大學衍義一書聖賢格言無不畢載欲致太平舍此不可願於聽朝之暇命儒臣講說非有大故無得間斷使知古今若何而治政事若何而得必能開廣聰明增光德業而邪佞之以奇巧蕩聖心者自見疎遠天下生民受福無窮矣帝雅以博習自負見疏大怒曰豎儒謂朕未讀大學耶薄朕至此不可不誅學士陳循頓首曰俗士處遠不知上無書不讀也帝意稍解猶下祚獄逮其家人十餘口隔別禁繫者五年其父竟瘐死而其時主事郭循以直諫帝怒竟手射之下之獄英宗立祚與循皆復官祚再

按湖廣風節愈勁遼王貴烺淫酷祚與巡撫吳政劾之帝怒械兩人至京論死既而悉驗乃赦出獄改官南京尋遷福建按察司僉事閩中憎其威不敢犯神祠不載祀典者悉撤去之以其材治學宮修官舍久之以疾歸卒祚天資嚴冷雖子弟罕接其言笑獨重里人邢量巨挾冊質疑往往至暮量終歲不一至祚所隱於卜終身不娶敝屋數椽或竟日不舉火其學自經史諸子及百家言無所不通文襄永嘉人永樂十年進士既拜河南左布政使居官勤厲軍民利病輒陳奏興革云

劉球

按明外史本傳球字求樂安福人永樂十九年進士家居讀書十年從學者甚衆授禮部主事胡濙薦侍經筵與修宣宗實錄改翰林侍講從弟玘知莆田遺夏布一匹球封還貽書戒之正統六年王振欲立威邊陲用王驥征麓川球抗疏曰帝王之馭四裔必宥其小而防其大所以適緩急之宜爲天下久安計也周伐崇不克退修德教以待其降至於獫狁則命南仲城朔方以備之漢征南越不利卽罷兵賜書通好至於匈奴雖已和親猶募民徙居塞下入粟實邊復命魏尙守雲中拒之今麓川殘寇思任發素本羈屬以邊將失馭致勤大兵雖渠寇未殲亦多戮羣醜爲誅爲舍無繫輕重璽

書原其罪覺使得自新甚盛德也邊將復議大舉欲屯十二萬衆於雲南以趣其降不降則攻之不慮王師不可輕出蠻性不可驟馴地險不可用衆客兵不可久淹是皆兵法所忌也況南方水旱相仍軍民交困若復動衆紛擾爲憂臣竊謂宜緩天誅如周漢之於崇越也至如瓦剌終爲邊患及其未卽騷動正宜以時豫防迺欲移甘肅守將以事南征卒然有警何以爲禦臣竊以爲宜慎防遏如周漢之於獫狁匈奴也伏望陛下罷大舉之議推選智謀將帥輔以才識大臣量調官軍分屯金齒諸要害如趙充國屯湟中故事結木邦諸蠻以爲援乘間進攻因便撫諭不煩大兵寇自可服至於西北障塞當勅邊臣巡視濬築溝垣增繕城堡勤訓練嚴守望以防不虞有備無患之道也章下兵部謂南征已有成命不用球言八年四月雷震奉天殿球應詔上言所宜先者十事曰古聖王不作無益心正而天不違之宜勤御經筵少居宮苑數進儒臣講求至道使問學日新政由己出則權不下移太祖太宗日視三朝時召大臣於便殿裁決庶政故權總於上宜收獨持之柄使政本歸一古大臣有犯雖至大戮使自裁不加刑也今有小失輒桎梏箠楚之曾未踰時又還其職甚非所以敬大臣也宜置小過不言果不可容下法司定罪使自爲計勿輒繫辱今太常卽古秩宗卿貳皆缺宜